

弘

光

實

錄

鈔

弘光實錄鈔敘

寒夜鼠噬架上發燭照之則弘光特邸報臣畜之以為史料者也年來幽憂多疾舊聞日落十年三徙聚書復闕後死之責誰任之手先取一代排比而纂之證以故所聞見十日得書四卷名之曰弘光實錄鈔為說者曰實錄國史也今子無所受命冒然稱之不已僭乎臣曰國史既亡則野史即國史也陳壽之蜀志元好問之南冠錄亦誰命之而不謂之國史可乎為說者曰既名實錄其曰鈔者不已贅乎臣曰鈔之為言畧也凡書自備而畧之者曰抄實錄纂修必備負開局今以一人之聞見能係其無畧乎其曰鈔者非備而鈔之也鈔之以求其備也臣既削筆洗硯慨然而歎曰帝之不道誰豎

子小夫亦計日而知其亡也然諸壞政皆起于利天下之一  
念歸功定策懷仇異議馬既挾之以翻逆案四鎮挾之以領  
朝權而諸君子亦遂有所領顧忌而不敢為于是北伐之事  
荒矣迨至追理三案其利藹樂禍之心不感恩于闔賊者僅  
耳傳曰臨禍忘憂憂必及之此之謂也嗚呼南都之建帝之  
酒色幾何而東南之金帛聚于士英士英之金帛幾何而半  
世之恩仇快于大鉞曾不一年而酒色金帛恩仇不知何在  
論世者徒傷夫帝之又死于路而不知也尚亦有利哉古藏  
室史臣黃宗羲識時戊戌冬十月甲子朔

弘光大臣月表

古藏室

大學士吏部尚  
戶部尚  
禮部尚  
兵部尚

書

書

書

書

崇禎十史可法張慎言周堪賡顧錫疇馬士英

七年五馬士英

陳子壯

月庚寅高弘圖

乙丑召

監國壬姜曰廣

寅即位王鐸

六月丁士英

己朔可法

慎言  
能  
堪賡

錫疇  
錢謙益  
士英  
張國維

註  
能  
己卯

劉宗周  
丙子起

<p>辰朔 八月丙 士英</p>	<p>亥朔 七月丁 士英</p>	
<p>弘圖 可法</p>	<p>弘圖 曰廣 鐸</p>	<p>弘圖 曰廣 鐸</p>
<p>石麒麟</p>	<p>石麒麟</p>	<p>徐石麒麟 辛巳起</p>
<p>賀世壽 戊午升署</p>	<p>堪賡</p>	
<p>張有譽 管紹寧</p>	<p>錫嘯</p>	<p>子壯 協理詹 事辛酉 起</p>
<p>士英 國維</p>	<p>士英 國維</p>	<p>戊政甲 起</p>
<p>世壽署 朱之臣 署</p>	<p>賀世壽 侍郎署</p>	
<p>應瑞</p>	<p>何應瑞</p>	
<p>宗周</p>	<p>宗周</p>	

曰廣	九月丙戌朔	士英	石麟	官場	有譽	紹寧署	士英	之臣署	應瑞	宗周 <small>己癸</small>
鐸	可法	弘圖	曰廣 <small>己癸</small>	羅	黃道周 <small>協理詹事甲辰起</small>	國維	李沾 <small>子壬</small>	龍		
鐸	十月乙卯朔	士英	石麟 <small>卯</small>	有譽	紹寧	士英	之臣署	應瑞	沾	
可法	龍	弘圖 <small>庚申</small>	張捷 <small>庚申</small>		道周	國維	解學龍 <small>庚申起</small>			

十一月	乙酉朔	十二月	乙卯朔	弘光元年正月
龍	鐸	士英	鐸	士英
捷	捷	捷	捷	捷
有譽	有譽	有譽	有譽	有譽
錫疇	錫疇	錫疇	錫疇	錫疇
道周	道周	道周	道周	道周
士英	士英	士英	士英	士英
學龍	學龍	學龍	學龍	學龍
應瑞	應瑞	應瑞	應瑞	應瑞
沾	沾	沾	沾	沾

乙酉朔鐸

蔡奕琛

乙未升

二月甲士英 捷

寅朔 可法

鐸

奕琛

三月甲士英

捷

有譽

謙益

士英 倬

應瑞

沾

有譽

錫疇 己巳

士英

高倬 杞

應瑞

沾

致仕

阮大鍼

代

謙益 己巳

己未加

國維 辰

子壯

假歸

李希沅

署

王心一 署

弘光大臣月表

三



申朔

可法

世壽

子壯

大鉞

鐸

國維

奕琛

希沅

四月癸士英捷

有譽

謙益

士英

倬

應瑞

沾

丑朔

可法

子壯

大鉞

死難

國維

鐸

希沅

奕琛

五月士士英捷

有譽

謙益

倬

死難

應瑞

沾

牛朔甲

逃

子壯

牛帝出

鐸迎降

奔

奕琛

弘光大臣月表

弘光大臣月表

弘光實錄抄卷一

古藏室史臣黃宗羲撰

崇禎十七年夏五月庚寅福王監國于南京

諱由松 神宗皇帝之孫也父常洵國于維陽十六年正月為流賊所害北部之變諸王皆南徙避亂時留都諸臣議所以立者兵部尚書史可法謂太子永定二王既陷賊中以序則在 神宗之後而瑞桂惠地遠福王則七不可

謂貪漢誦酒不孝虐下不讀書干與有司也

唯潞王芳諱常素有賢名雖穆宗之

後然昭穆亦不遠也是其議者兵部侍郎呂大器武德道雷縉祚未定而逆業阮大鍼久住南都線索在手遂走誠意伯劉孔昭鳳陽總督馬士英幕中密議之必欲使事出

于已而後可以為功乃使其私人楊文驄持空頭箋命其  
不問何王遇先至者即填寫迎之文驄至淮上有破舟河  
下中不數人或曰福王也楊文驄入見啓以士英爰立之  
意方出私錢買酒食共飲而風色正順遂開船兩晝夜而  
達儀真可法猶集文武會議已傳各鎮奉駕至矣士英以  
七不可之書用鳳督印印之成案于是可法事事受制于  
士英矣臣按士英之所以扶可法與可法之所以受挾于  
士英者皆為定策之異議也當是時可法不妨明言始之  
所以異議者社稷為重君為輕之義委項已定君臣分明  
何嫌何疑而交構其間乎城府洞開小人亦失其所秘奈  
何有諱言之心授士英以引而不發之矢乎臣嘗與劉宗

周言之宗周以為然語之可法不能用也

進兵部尚書史可法東閣大學士加鳳陽總督馬士英兵部尚書東閣大學士改戶部尚書高弘圖為禮部入閣辦事台工部侍郎周湛賡為戶部尚書

辛卯以姜曰廣王鐸俱禮部尚書東閣大學士

壬辰以總兵張應元鎮守承天

戊戌瑞王常浩避寇駐重慶事聞

命總兵趙光遠鎮守四川

己亥以總兵鄭鴻遵鎮九江黃蜚鎮京口

庚子設四藩以黃得功為靖南侯高傑興平伯劉澤清東平伯劉良佐廣昌伯

四藩者其一淮徐其一揚滁其一鳳泗其一廬六初黃得功高傑在北劉澤清在山東劉良佐在淮北都既陷亂卒南下遂皆渡淮而處而淮北為賊所有馬士英既借四鎮以迎立四鎮亦遂為士英所結史可法亦恐四鎮之不悅已也急封爵以慰之君子知其無能為矣

晉左良玉為寧南侯

壬寅福王即皇帝位以明年為弘光元年

黃得功高傑相攻

四鎮欲以家眷安插江南浮兵而渡亟諭止之令擇江北以處而得功澤清傑皆欲維揚爭端遂肇及有旨傑揚州而傑兵亮暴尤甚揚人惡之閉城登陴堅不肯納得功以

其家眷至儀真遂傳令攻傑傑亦野營以待之史可法百方調停而以瓜州處傑

乙巳大學士史可法出督師于淮揚

士英入叅機務可法動受其制不得已而出留都諸生數百人合疏留之不得至十月有何光顯者言請可法擬士英操莽廷杖殺之

賊帥劉暴頌偽勅請南侯黃得功繫之

闖賊以董學禮為淮鎮領兵一千五百至宿遷使偽威鎮將軍特勅五道諭降得功高傑劉伊盛大教場劉肇基小教場徐大受得功繫之候命正法

己酉御史陳良弼劾從賊虐事項煜



煜自北京逃回混入班行

辛亥毅勇衛以總兵徐大受鄭綵分領水陸閩人李國輔監之

壬子魏國公徐弘基安遠侯柳昌祚靈璧侯湯國祚撫寧侯朱國弼南和伯方一元誠意伯劉孔昭東寧伯焦夢龍咸安伯郭祚永各晉官銜二級加祿米五十石

司禮監太監韓贊周司禮監秉筆太監盧九德各蔭弟姪二人錦衣衛僉事世襲

甲寅上命祭行告祭禮泗陵鳳陵遣督師大學士史可法顯陵遣寧南侯左良玉神烈山韓憲王墳遣靈璧侯湯國祚咸安伯郭祚永壽春以下諸王遣鳳陽府官

乙卯破賊報至封吳三桂薊國公世襲

四月二十日吳三桂引北兵與賊戰敗之次日又敗二十七日賊收兵入城二十九日賊將其資重出京至蘆溝橋又遇北兵敗之北兵追賊至保定固關

召陳子壯為禮部尚書

六月丁巳朔宣南侯左良玉自序恢復地方

十六年八月復武昌十月十三日復原武十一月二十七日再復袁州又復萍鄉十二月初二日復萬載初五日復澧陵二十六日復長沙湘潭湘陰又復臨湘岳州十七年正月十六日復監利二十二日復石首二月十一日復公安惠安乘勝直擣隨州未滿三月復府州縣一十四處

庚申復宿遷擒賊官呂弼周王富

追崇皇考曰恭皇帝皇妣氏曰恭皇后

辛酉上 大行皇帝謚曰烈皇帝廟號思宗

起錢謙益協理詹事府事禮部尚書

壬戌遣御史陳蓋募兵雲南

惠王常潤寓華慶事聞

癸亥分守睢陽參將丁啟光獻俘闕下

歸德府偽管河同知陳奇商止偽知縣賈士俊柘城偽知

縣郭經邦鹿邑偽知縣澄寧陵偽知縣許承廕考城偽

知縣范祿夏邑偽知縣尚國儁偽條記一顆偽契六顆

揚州鄉官鄭元勳民變被殺

高傑擾害地方撫臣黃家瑞守遼馬鳴驛輓城中百姓日  
取河邊草隙零兵而殺之兵民相構日甚元勲往未營後  
中解之百姓疑其導之為惡因元勲一言之誤于巡撫座  
上羣起而殺之解其文體史可法叅家瑞鳴驛有旨議處  
父老詣闕申請于是留任

乙丑馬士英翻欽定逆案

士英奏原任光祿寺卿阮大鍼居山林而不忘君父未任  
邊疆而實嫺輜畧北信到時臣與諸臣面商定策大鍼致  
書于臣及操臣劉孔炤戒以力埽邪謀臣甚服之須遣官  
立召暫假冠帶來京陛見面問方畧如其不當臣甘同罪  
若堪實用則臣部見缺右侍郎當救其罪往勅部起補于

是召對大鉞大學士高弘圖請九卿集議不當以中旨用  
大鉞戶科給事中羅萬象奏逆案阮大鉞不由廷推不由  
會議啟事之日無不共為驚疑陛見之時又無不共為竊  
笑以大鉞為知兵耶燕子箋春燈謎未便是枕上之陰符  
袖中之黃石也 先帝之成令一朝而棄之皇上之明詔  
一朝而反之抑何以示不倍之誼乎戶科右給事中熊汝  
霖奏阮大鉞 先帝已既棄之舉國又復非之即使閣臣  
實見得是亦當舍己從人况乎陰陽消長間不容髮寧博  
採廣搜求異材于草澤胡執私違眾翻鐵案于刑書御史  
陳良弼米壽圖周元泰合奏自魏逆竊權羣小煽毒嚴春  
秋亂賊之義必先申其治黨之法此從逆一案 先帝所

以示丹青之信也臣何仇于大鉞正恐從此諸邪悉出逆  
業盡翻使久定之典紊之一日何以昭天下而戒後世  
也懷遠侯常延齡奏大鉞者一戲齣之流為闖人之乾子  
魏逆既誅大鉞即膏鉄鉞猶有餘辜而僅禁錮終身已高  
厚包容之矣兵部左侍郎呂大器太僕寺少卿萬元吉給  
事中陳子龍御史詹兆恒王孫蕃左光<sub>斗</sub>皆爭之而大學士  
姜曰廣持之猶力士英乃奏臣通籍三十年安因之變臣  
家僮只存十口臣已斃死壬申臣備兵易和兵犯宣大  
及任宣撫止五十日被逮詔獄錮刑部者將三年臣又斃  
死從戍所起臣總督鳳陽兵僅九千馬僅數百而華左獻  
逆小袁等賊且數十萬臣又斃死陷闕陷京師禍及先帝

臣罪應死今無知而存阮大鍼又當死蓋臣得罪封疆得罪祖宗者未必死而得罪朋黨則必死 先帝誅薛國觀周延儒等豈盡 先帝之意哉大學士史可法以調停之說進曰昨監國詔款諸臣彙集經臣改定內起廢一款有除封疆逆案計典職私不准起用一段臣為公之以國事之敗壞非常人材之彙征宜庶未可仍執往時之例耳後來不知何故復入此等字面此示人以隘不欲以天下之才供天下之用也應天府丞郭維經奏督輔史可法雅負人望亦有失言之過記得四月初旬北音正惡督輔招臣等科道于清議堂論救時急著首在得人臣等各舉所知督輔執筆而記之等慮人眾言雜乃合詞謂逆案斷不可

翻督輔深以為然言猶在耳何其忽而易忘其曰詔款逆案一段臣已改去不知諸臣何故復用夫詔書撰以史筆定于聖裁便無反汗藉曰督輔去之諸臣不宜復改豈皇上用之督輔又可復改之乎况逆案成于先帝之手豈督輔亦欲決而去之手今方欲修先帝實錄若將欽案抹殺不書則赫赫英靈恐有餘惻或非皇上所以待先帝若必書之而與今日起用之大鉞事相對炤則顯顯令德未免少愆並非二輔所以待皇上也誠意伯劉孔炤乃為士英上言伏讀詔書罪廢各逆案計典贓私俱不得輕議而置封疆失事于不言聞當事者仍將有以用之也此詔款之中乃見一段門戶之肺肝朋黨之禍于斯為



烈士英又奏臣止謂大鉞非逆非謂逆案當翻逆案諸臣  
日久已登鬼錄翻之何用既非逆案中人不與當日之  
事翻之何為與其身犯衆怒為死灰罪魄之魁何如勉附  
清流竊正人君子之庇舍苑集枯臣雖愚不為也監國詔  
書據閣臣史可法疏謂逆案等事俱抹公而呂大器添入  
之是以戎臣而增減詔書也臣接逆閣魏忠賢既誅其從  
逆者先帝定為逆案頒行天下逆党合謀翻之己己之  
變馮銓用數萬金導北兵至喜峯口欲以疆場之事翻案  
溫體仁訐錢謙益而代之欲以科場之事翻案小人計無  
不至毅宗訖不可大鉞利國之舊得士英而用之然後  
得志嗚呼北兵之得入中國自始至終皆此案為之案也

丙寅太僕寺少卿萬元吉上封事

先皇帝大度英武銳意明作乃世不加治禍亂益滋者其故何也則寬嚴之用偶偏而任議之途太畸也先帝初臨海宇懲逆瑞用事斷削正氣固嘗委任臣功工力行寬大矣諸臣狃之爭意見之元黃畧綢繆之桑土□入郊圻束手無策先帝赫然震怒一時宵旰遂乘閒抵隙中以用嚴之說凡廷杖告密加派抽練種種新法備經舉行使在朝者不暇救過在野者無復聊生然後號稱明作乃□氣如故寇禍弥張十餘年以來小人用嚴之效彰彰如是先帝悔之于是更崇寬大悉反前規天下以為太平可致諸臣復乘之競賄賂肆欺蒙每趨愈下再櫻先帝之

怒誅殺方興宗社繼沒蓋諸臣之孽每乘于先帝之寬而先帝之嚴亦每激于諸臣之玩所謂寬嚴之用每偏者此也昨歲督師孫傳庭擁兵關中識者俱以為不宜輕出然已有逗留議之者矣賊既渡河臣與閣臣史可法姜曰廣云急撤關甯吳三桂俾隨樞輔迎擊都城始固既蒙先帝召對亦曾及此然已有感地議之者矣賊勢薰灼廷臣勸南幸勸太子監國留都然已有邪妄議之者矣由事後而觀咸追恨議者之誤國設事幸不敗必復功議者之守經臣所謂任議之途太畸者此矣追原禍始不禁酸心仰祈皇上博覽載籍延訪羣工蓋崇簡易推真誠之謂寬而濫賞縱罪者非寬辨邪正綜名實之謂嚴而鉤距

索嚴者非嚴寬嚴得濟任議乃合

路王寓杭州

有旨約束其從人蓋士英之意無日不在王也

吉王薨

謚大學士劉一燝文端賀逢聖文忠

戊辰馬士英密陳四事

一聖母在郭家寨有常守文者知之一皇考梓宮遇難時  
之藁葬不備命安撫李際遇護送南來一選淑女以備宮  
中一防護親藩恐為奸宄所挾

己巳左懋第以應安巡撫守防上游

辛未戶科給事中羅萬象諫用閩人王肇基督餉

命司禮監隨堂太監王肇基出督浙直閩金花白糧等餉  
萬象奏先帝以三餉疊加而敗今中使復奉旨而出威  
令嚴重厨傳供億有司必奉承爭先圖圉圉折楊生民塗炭  
東南半壁其堪再壞乎大學士高弘圖自請督餉于外有  
旨留之于是責成撫按

改鳳陽總兵年文綬提督京營以東平伯劉良佐代之

太僕寺少卿萬元吉請卹陣亡將佐

疏言臣前護軍四川追勦獻操二賊總兵猛如虎恭將劉  
士傑遊擊郭闕守備猛先捷從瀘州至開縣二千餘里深  
入追殺士傑先捷俱死之臣丁艱回籍猛如虎守南陽闕  
闕賊攻城甚急如虎以計破之傷賊數千既聞他門失守

猶持短刃砍殺多賊至唐府國門望北拜賊剗刃害之  
癸酉靖江王攻復隨州

甲戌賊至濟寧叅將李允和敗之

郭賊三千騎至濟寧扎營差其下五人偽為凌兵部家人  
入州伏聽搜獲允和與朱繼宗領兵至黃家集殺步賊三  
十餘馬賊不敢傳城

起張國維為戎政尚書

乙亥湖廣巡按御史黃澍召對劾馬士英于上前

輔臣高弘圖姜曰廣馬士英王鐸班殿左公侯伯等班殿  
右上傳召御史黃澍來見澍奏臣三年守汴蒙 先帝拔  
置臺員湖廣僉陷差臣巡按本年九月臣至九江與鎮臣

左良玉相會鎮臣暫駐九江不敢遽催其前往臣單身赴楚與監臣何志孔撫臣王錫基招集流移特武昌初復城內人民不過百餘至舊冬今春人心始定正月左鎮至楚分兵四出恢復長沙岳州荊州德安等府四月中旬左鎮率全部之兵將指承天臣及撫臣何騰蛟王錫基竭力措辦糧料除犒賞外止得本色一萬餘石不足供左兵十日之糧左鎮諒臣等心力耗竭慨然發兵二十日以後攻圍承天賊百計堅拒我兵酷暑糧盡襄陽之賊乘計夾攻至五月十三日良玉恐持久發生勅兵暫退及臣到漢口接樞臣史可法手書始知先帝已殉社稷皇上已監國南京臣一痛幾絕二十三日各臣會于漢口設立先

帝祥位哭臨既畢次捧 皇上令百叩頭行禮左鎮流涕  
而言曰殺賊復仇本鎮主之措辦錢糧撫按主之 新主  
登極本鎮錢糧未有所屬往議不可緩也臣慨然任之于  
二十六日自漢口起身赴都陞見乞 皇上念鎮臣剿賊  
二十餘年身經數百戰當此天崩地裂忠念愈堅只以糧  
乏為憂 上云左鎮忠義朕所素鑒糧餉自當與之左兵  
若干澍奏左鎮食糧之兵原額一萬八千上顧戶部問餉  
幾何旁無應者澍奏約該餉八十餉餘萬舊年欠額尚多  
今年不知出于何所臣所以急求議者萬一三軍無食南  
下索餉臣與鎮臣等一身不足惜其如江南半壁何 上  
云該部計議速發澍奏天下事勢到此臣見目前所為還



未嘗為 皇上做實事者 先帝只因閹部不得其人一  
敗塗地況在今日不知士英何等肺腸棄下陵寢居然來  
作閹臣下翻弄朝權分明利 先帝之死以成自就自家  
富貴此不忠之大者况二陵為國家發祥之地無故輕棄  
萬世而下史臣記事止說是 皇上棄祖陵是士英以不  
孝之名遺 陛下也士英祇有死罪即 上念其新功就  
比四鎮例封之為伯晉之為侯或者為其兵權可以脅主  
作威作福便裂土而王之總宜到陵上公不宜在朝士英  
奏臣在陵上勞苦多年澍奏士英勦賊之官致使賊害  
先帝死有餘辜敢在 上前說勞說苦士英奏臣功多過  
少澍奏何為功多天崩地裂草莽小民亦有死罪在身爾

遂說功 上顧內臣云直被黃澍說盡澍又奏士英自為  
兵部以來不見其發兵守江守城即朝門外不過數人而  
士英私宅兵馬羅列其意欲挾兵自重入朝便借兵威以  
脅 皇上出朝即假 皇上威靈以詐騙各鎮將司馬懿  
之心人皆知之矣士英奏兵部不該帶兵即史可法自淮  
撫入為兵部未嘗不帶兵也澍奏士英馬敢比可法君子  
而不仁者有矣夫未有小人而仁者也且今日是何時候  
可法又未嘗將兵脅人又未嘗將兵守門士英奏反臣因  
帶兵受人言語昨呂大器尚云臣要反澍大聲叱士英奏  
反之一字為臣子者豈敢出之于口士英今日敢于上  
前信口直言其目中何嘗有朝廷無人臣禮可謂極矣臣

料士英作反非不為也不能澍憤激免冠叩頭不已云臣  
今日誓不與賊臣俱生 皇上殺士英以謝祖宗即殺臣  
以謝士英輔臣王鐸侍郎張有譽勸澍復冠 上云澍起  
澍云奏事未完 上云起來再奏澍三少頃又奏士英在  
壽州二年殃民剋軍駐私何啻百萬士英奏臣居輦下  
皇上即抄臣果有百萬斬臣否則斬澍澍奏士英之言奸  
貪之口供也彼以九十九萬即不受斬矣士英奏臣在鳳  
陽雖然無功未嘗失一城池黃澍按楚郡邑之失陷者不  
知凡幾澍奏天威咫尺士英尚在夢中曾為總督而楚中  
城池失陷日期茫然不知然士則士英塘報更無的實以  
欺 皇上可知矣士英語塞澍奏自江北七府盡失 先

帝始遣臣及臣至九江則長沙永州寶慶皆陷矣士英說臣失城池紅牌說謊之罪不容辯也士英奏澍在湖廣與在家多為不法澍奏臣不法何事即于上前奏明以正臣罪上云臺臣輔臣如此大爭非朕所願澍奏獻賊兵部兵尚書周文江麻城人獻賊用其計破省文江又獻下南京之策獻賊與白銀十萬使之招兵左鎮恢復蘄黃文江計無復之將金帛美女獻之士英暗通線索士英朦朧上奏先帝用為副將守備太監何志孔奏別事臣不敢與聞若云文江則臣監視也文江原為偽尚書不知何故又為士英題用秉筆太監韓贊周奏按臣言官與大臣爭執宜也志孔內貲不宜在殿上與外臣爭論志孔云亂臣

賊子人人得而誅之當仁不讓臣言者公也贊周云畢竟不宜志孔乃起澍又奏士英之罪摧髮難數此特其一節耳士英奏黃澍有党臣無党澍奏先帝在日臣在言路極盛時孤立不肯附人臣何党士英與阮大鍼乃党耳上云亦補疏來各叩頭退澍補疏謂士英十可斬鳳陵一抔土是國家發祥之地士英受知先帝是宜生死以之巧卸重任居然令兵萬杵而下貽皇上以棄祖宗之名是為不忠可斬國難初定八人辨必死之志為先帝復仇士英總督兩年居肥擁厚有何勞苦明聖之前動云辛勤多年是驕蹇可斬奉命討獻而未嘗出蘄黃一步奉命討闖而未嘗出壽春一步以致賊勢猖狂不可收拾是

謂誤封疆可斬獻賊兵部尚書周文江之金朝以入而叅  
將之荐夕以上是謂通賊可斬市棍黃鼎委署麻城以有  
司之官娶鄉宦梅之煥之女士英利其奸邪互相表裏黃  
鼎私鑄闖賊果殺將軍銀印託言奪自賊手飛報先帝  
士英蒙厚賞鼎加封副將麻城士民有假印不去真官不  
來之謠是謂欺君可斬皇上中興人歸天興士英以為  
非我莫能為金陵之人有若要天下平除非殺了馬士英  
之謠是謂無等可斬生平至污至貪清議不齒幸以手足  
圓消漏名逆案其精神滿腹無日忘之一朝得志特荐同  
心逆党之阮大鍼大鍼在朝為逆賊居家為倡優三尺之  
童見其過市輒唾罵之士英蔑悔前朝矯誣先帝是謂

造叛可斬各鎮忠義自奮 皇上殊恩士英動云由我是  
謂市恩可斬馬匹兵械札營私居以防不測以脅朝廷臣  
是謂不道可斬上得罪于 二祖列宗下得罪于兆民百  
姓舉國欲殺大英棄餘以奸邪濟跋扈之私以要君為賣  
國之漸十可斬也士英補疏奏黃澍謂臣棄陵臣因南中  
諸大臣大逆不道謀立踈藩乃諸臣與鎮歃血祖陵之前  
勒兵江上主持大義何云棄陵奉 皇上睿旨入朝面議  
登極大典又何云棄陵 皇上試問黃澍承天之陵曾否  
恢復澍之此未奉何宣台是否棄陵在澍為党人主使牽  
引左鎮以要扶 皇上為門戶出力此是年未言路常態  
而奏對間之間忽出內臣睜眉怒目發口相加以內臣叱

辱閣臣辱大臣則辱朝廷矣臣何顏復入綸扉之殿何面  
再登司馬之堂乞 皇上將臣官階盡行削奪或發建陽  
舊戍或充鳳陵陽陵戶以快奸黨之心有旨何志孔以內  
臣攬議外臣殊傷國體即議處分而志孔者巡視湖廣與  
澍同來士英終畏左鎮上疏救之乃已臣按士英以四鎮  
兵威脅朝諸朝臣澍即以左鎮兵威脅士英所謂詐之見  
詐也向若澍無所挾讜論如是忠矣哉

丙子國子監典籍李模上言將諸不可言定策

今日擁立之事 皇上不以得位為利諸臣何敢以定策  
為名甚至定策之名加之鎮將鎮將事 先帝未聞効桑  
榆之收事 皇上未聞彰汗馬之績業其實亦在戴罪之



科予之定策其何敢安

起劉宗周為左都御史

禮部尚書顧錫疇上言剋期進取

疏云守則分久守則力詘蓋必不支之勢也立降明詔  
指日誓師士民擒殺偽官何以撫之邊臣擁兵何以通之  
志士退保山林澤何以奮之陷臣乃心王室何以歸之失  
今不圖使西北之民忠憤之氣漸衰而賊戢理之方漸備  
然後欲圖進取為力甚難

丁丑草莽孤臣劉宗周慟哭時難艱上陳四事

痛我高皇帝以用夏蠻夷旋乾轉坤之大業而一旦為奸  
臣賊子所賣致國破君亡亘古未聞晉天飲恨今日中興

大業舍討賊復仇固無以表  陛下前古渡江之心而苟  
非  陛下毅然決策親征亦何以作天下忠臣義士之策  
一曰據形勢以規進取江左非偏安之業淮安鳳陽安慶  
襄陽等處雖各立重鎮尤為重在鳳陽而駐以  陛下親  
征之師一曰重藩屏以資捍禦淮陽數百里之間見有兩  
節鉞而不能禦亂卒之南下致淮北一塊土拱手而授之  
賊矣路振飛坐守淮城久以家眷浮舟于遠地是倡逃之  
實也于是鎮臣劉澤清高傑相率有家眷寄江南之說尤  
而效之又何誅焉按軍法臨陣脫逃者斬臣謂一撫二鎮  
罪皆可斬也必先治撫臣不律之罪而後可行于鎮臣一  
曰慎爵賞以肅軍情無故而施之封典徒以長跋扈臣以

左帥之恢復焉而封高劉之敗逃也而亦封又誰為不封者武臣既封文臣隨之外廷既封中璫隨之臣恐天下因而解體也一曰覈舊官以立臣紀燕京既破有受偽官而叛者有受偽官而逃者有不受偽官而逃者有在封守而逃者有在使命而逃者而於法皆在不赦至有偽命南下徘徊於順逆之間必且倡為一種曲說以惑惑人心不特偽官偽并真官亦化為偽而天下益不可為矣當此國破君亡之際晉天臣子皆當致死倖而不死反膺升級能無益增天譴除濫不宜典概行外此後一切大小銓除暫稱行在小存臣子負罪引愆之情詩不云乎天之方斲無然泄泄初劉清澤自附清流及見此疏頓足恨曰我一生精

神皇為劉念臺空費密遣人刺之時宗周在丹陽蕭寺中  
危坐終日刺者肅然不敢加害而馬士英疑宗周意在潞  
王揚言于朝曰劉宗周請 皇上駐蹕鳳陽者以鳳陽高  
墻所在凡宗室之有罪者處之是以 皇上為罪宗也其  
私人朱統鐸遂上疏宗周謀出 皇上于鳳陽則南豐都  
豐邑根本所在將擁立何人以居此乎

戊寅以翊護功封千戶常應俊為襄衛伯

御史劉之渤請從祀朱知德于孔廟

吏部左侍郎呂大器罷

己卯吏部尚書張慎言罷

慎言荐用舊輔吳姓太宰鄭三俊兩人者為諸小人所畏

有旨召姓是日常朝畢勲臣羣跪而前指慎言及姓為奸邪叱咤之聲徹御座戶科給事中羅萬象出班奏張慎言生平具在事出草創或有不明不可謂有私也吳姓素有清望安得指為奸邪諸勲臣伏地痛哭云慎言舉用文吏不及武臣驚然不已矣萬象奏此朝廷也體統安在退而誠意伯劉孔炤上疏劾慎言云臣見其條陳內偽命一款謂屈膝覲顏之臣事或脅從情非委順侯其歸正不必苛議臣不勝駭愕又見其荐奉吳姓鄭三俊更為可異姓受命督師逗留三月不出國門一步殆後遣戍悠游里居三俊係恂用侯恂喪師盛地引用吳昌時招權植黨此皆萬世罪人何居乎而荐之慎言原有二心當告廟決策迎立

主上之時阻難奸辨人人咋舌廷臣具在可質伏乞收回  
吳姓陞見之命將慎言之受賄重處以欺君誤國之戒羅  
萬象上言諸勲臣謂今日用文不用武 皇上首封者四  
鎮矣新改京營又加二鎮銜矣武官布列原未曾缺何嘗  
不用武臣耶年來封疆之法 先帝獨寬武臣而武臣之  
所効 先帝者何如乎祖制以票擬歸閣臣以叅駁責言  
路不聞以勲臣兼糾劾也使勲臣而司糾劾為文官臣者  
可勝逐哉大學士史可法奏諸勲臣之不欲用姓者誠慮  
姓有偏執則國全才臣姓屬吏最久有以知其不然也  
即諸臣知其不可集公辭言之可也具公疏爭之可也何  
事痛哭喧呼聲徹殿陛聞之驕將悍卒不益輕朝廷而長

禍亂耶皆主辱而臣死今主死而臣生凡在臣工誰能無罪文臣固多誤國武臣豈盡矢忠今之累累降賊者不獨文臣為然也若各執成心日尋水火文既與武不和而文之中又有與文不和者國家朋黨之禍自此而開人才向用之途自此而阻臣不願諸臣之存此見也姓既不受召慎言亦罷扁舟不知所之

工部尚書程註罷

辛巳遙加舊輔謝陞上柱國少師太子太師改禮部尚書御史盧淮工部右侍郎黎玉田兵部尚書俱充山陵使往北祭告特聞三人建義東省

京口兵變

遣兵于永綬等駐扎鎮江而浙中八衛之兵台區羅木二  
營分守扎西門外遣兵嘗言四鎮以封搶殺封伯吾等之  
未封者緣不搶殺耳是日邊兵攫小兒瓜相持不讓傷兒  
類羅木兵旁觀不平攢毆之邊兵遂擊浙兵火民居者十  
餘里常鎮道張調鼎檄台兵往救備倭李大開元之浙兵  
踉蹌南下其帥持刀斫之不能止于是令浙兵還浙而邊  
兵亦調儀真

起徐石麒為吏部尚書

甲申贈元難舉人張履旋為御史

冢宰張慎言之子

奪故輔溫體仁謚



體仁謚文忠初體仁得謚徐忠襄謚聞之笑曰也只差一字若謚為忠忠則可矣言忠于魏闡也奪命之下天下快之而張捷為太宰以險邪有玷秩宗泰領顧錫疇奉旨故輔體仁清執端重文忠之謚出自先帝顧錫疇如何以私憤議削其原有謚廕俱准復

以總兵黃斌卿駐防京口

御史朱國昌劾逃官山東巡撫丘祖德山西巡撫郭景昌漕河總督黃布憲

以御史王燮巡撫山東總兵丘名鎮守山東

乙酉戶科給事中熊汝霖催四鎮北渡

四鎮總總淮揚逼處此土忠臣義士有所覲顏而不敢出

也原四鎮之采非止安頓家眷今既儼然佐命矣何不鼓行而前收拾齊豫恢復北都鬱然為中興名將與李晟郭子儀諸人並有千古況一鎮之餉多至六十萬勢必不供即仿古藩鎮法亦當在大河以北開屯設府永此帶礪曾與交之內而遷籬藩視之

七月丁亥朔以劉之渤巡撫四川未審圖巡按四川范鑛巡撫貴州

戊子命選淨身男子

謚死事舊總督盧象昇忠烈

象昇號九台南直人崇禎十一年九月北兵自牆子嶺入象昇與閩人高潛起分任東西二路陞見象昇主戰起潛

幸其飽掠而出託言持重本兵楊嗣昌陰主高閹于是象昇力戰援絕而沒

下邳死事甘肅巡撫林曰瑞

己丑追復懿文太子謚曰興宗孝康皇帝妃曰孝康皇后追  
上建文君謚曰嗣天章道誠懿淵恭觀文揚武克仁篤孝讓  
皇帝廟號惠宗后馬氏謚曰孝慈溫貞哲睿肅烈襄天弼聖  
讓皇后景皇帝謚曰符天建道恭仁康定隆文布武顯德崇  
孝景皇帝廟號代宗后汪氏謚曰孝淵肅懿貞惠安和輔天  
恭聖景皇后

辛卯以總兵金聲桓駐防淮揚

加北使左懋第兵部右侍郎右僉都御史馬紹愉太僕少卿

兵部職方司郎中陳弘範太子太傅

洪範紹愉故嘗為罪樞陳新甲款北懋第巡撫應安聞母變乞同洪範北去訪母骸骨因而命之

壬辰皇太后至自民間

太后張氏非恭皇元配也年與帝相等遭賊失散流轉郭家寨常守文家馬士英遣人迎之至其後士英挾之至浙不知所終或言帝之不蚤立中宮而選擇民間不已者太后之故也

癸巳贈名臣葉盛吏部尚書蔭羅欽順一子

妾人蔣玄上書自稱宜興碩儒

御史黃澍請卹長沙推官蔡道憲鍾祥和縣蕭漢留守都司

沈壽崇下江防道許文岐

賊陷長沙撫臣以下皆竄道憲挺立被執降之不屈又命  
降將尹先氏說之道憲罵賊三日夜不絕口賊怒甚寸磔  
之頭頸鋸斷兩瞳子炯炯不瞑漢字象石南豐人丁丑進  
士任蒲而聞襄藩陷自請留任以護陵土壬午冬賊圍鍾  
祥漢率衆死守明年元旦攻城破賊執之鎖于吉祥寺中  
漢書夷齊死後君臣薄力為君王固首陽兩語于壁用籬  
髮刀自刎血正注字上壽崇宣城人以誑悞為巡撫李振  
聲所忝杜門候旨聞賊入城冠帶望北叩首坐堂上賊刀  
之文岐為賊所執求死不得從賊之衆多黃麻間人文岐  
識之密約反正以柳園為弭而王固告變于賊臨刑歎曰

吾所以旦夕不死者不欲徒死耳死固分也

甲午謚故輔文震孟文肅少宗伯羅喻義文介宮詹姚希孟  
文毅大司馬呂維祺忠節

辛丑萬壽節

癸卯淮揚巡按王爕報皇太子永定二王皆沒

天下人心皆繫 先帝之後曰吾君之子也馬士英密令  
爕為上報以絕人望觀後皇太子之來則爕之肉其足食  
乎

謚王素忠愍蔡懋德忠襄

懋德字雲怡蘇州人也巡撫山西闖賊渡河太原陷德懋  
死之而賊遂薄都城矣後有責備之者有旨太原無十日

之守豈有糧盡援絕之事社稷邱墟一死何足塞責  
乙巳削故輔溫體仁薛國觀周延儒爵

奪罪撫熊文燦官

文燦在福建曾撫鄭芝龍以滅劉香及巡撫湖廣欲以故  
撫智撫張獻忠遂成滔天之禍

丁未補開國武臣謚傳友德武靖馮勝武壯

辛亥降賊閣臣丘瑜偽死遣其子上書

下部恤死難翰林檢討馬剛中

剛中河南人以鄉官守城死

丙辰馬士英使其私人朱統鐔奏大學士姜曰廣

曰廣與士英同官不稍偕以辭色士英恨之有宗室統鐔

者希得一官願為士英出力第一疏謂曰廣謀立跡藩第  
二疏列曰廣五大罪一蒙蔽引用東林死党鄭三俊吳姓  
房可壯孫晉把持朝政以劉士貞為通政阻遏章奏以王  
重為文選廣植私人二篡逆令楊廷麟出強盜于南康獄  
勾連大江湖大俠與水營奸弁窺探南都聲息非謀叔遷  
則謀別戴三庇從逆諸臣四受賄五奸媳吏科熊開元奏  
禮義廉恥四字陵夷至今日蕩然盡矣猶賴士大夫稍知  
學問者畫地而蹈義然獨行不能裨益邦家庶可儀型族  
黨如曰廣者誠亦其人而今竟欲以狗彘之行加孤潔之  
身取穢褻之言讀君父言之聽戶科熊汝霖奏輔臣姜曰  
廣海內欽其正直皇上鑒其忠誠么麼小臣為誰驅除為



誰指使上章不由通政結納當任何逢內外交通神叢互  
偕飛章告變墨敕封端自此始 先帝爲念宗藩而聞  
寇先逃誰死社稷保舉換授盡是殃民 先帝隆重武臣  
而死綏敵懷十無一二叛降跋扈背相望 先帝委任  
勳臣而官舍選練一任飽颺京營銳卒徒爲寇籍 先帝  
間任內臣而小忠小信原無足取開門迎降敵且噪傳聞  
所謂前事不遠後事之師也

設東廠

大學士高弘圖奏人心易擾當鎮之以安靜戶科給事中  
熊汝霖奏廠衛之害小人借以樹威因以牟利人人可爲  
叛逆事事可作營求縉紳慘禍所必不必言小民雞犬亦

無寧日 先帝十七年憂勤曾無失德而一旦受此奇禍  
止有殿衛一節未免府怨臣民今日締造之初調護尚難  
況可便行推朽蘇松巡撫祁彪佳御史朱國昌爭之

弘光實錄鈔卷一終

弘光實錄抄卷二

古藏室史臣黃宗羲撰

八月丙辰朔日有食之

戊午以張有譽為戶部尚書

以楊鶚總督川湖雲貴廣西軍務

兵科給事中陳子龍荐舉涂仲吉祝淵

仲吉江右人上書為黃道周頌寃入獄淵海甯人劉宗周去國淵上書被逮北都陷出獄以其友吳麟徵之喪歸至南都投到子龍以臺諫荐之有肯涂仲吉祝淵何功于國優以臺諫俱不准行

吏科給事中章正純諫中旨

庚申史可法加少保兼太子太保進武英殿大學士兵部尚書廕一子錦衣衛指揮僉事世襲馬士英加太子太師進武英殿大學士兵部尚書高弘圖加太子少師進文淵閣大學士吏部尚書姜曰廣加太子少保進文淵閣大學士禮部尚書王鐸加太子少師進文淵閣大學士戶部尚書各廕一子中書舍人

甲子命惠王住廣信

辛未福建巡撫張肯堂遣兵入衛

有旨命王應華楊重熙統領來前

左都御史劉宗周上臺員從賊姓名

率先從逆用事日久罪在上等者喻上獻其次則仕京而

偽命有據裴希度衛貞固陳羽白涂必泓蔡鵬霄柳寅東  
張鳴駿熊世懿偽命無據或拷或逃者陳昌言馮垣登周  
亮工劉令尹朱朗鑠金毓峒魏琯李植吳邦臣張茂爵倫  
之楷趙譔汪永紹鄭其勲在差而逃者河南蘇京山東余  
日新兵蘆向北巡倉徐養心巡漕沈向巡鹽楊仁愿或死  
或逃或叛尚無下落者真定劉顯芋宣大楊尔銘山西汪  
宗友甘肅傅景星河東成友謙茶馬徐一倫陝西黃耳鼎  
而耳鼎為馬士英私人方藉以搏擊于是上章力辨謂此  
案不可據有旨從逆何事妄以加人其後李沾重定為七  
款一曰從逆必誅偽吏政喻上猷偽庶常裴希度偽防禦  
陳羽白張鳴駿偽巡城涂必泓張茂爵其次傳聞從賊未

有的據熊世懿柳寅東蔡鵬霄吳邦臣衛貞固徐一倫一  
日誤叅宜辨楊仁愿李植魏瑄一曰慘死宜恤馮垣登削  
髮觸賊怒夾死俞志虞為土賊所殺陳昌言趙譔夾死一  
曰差滿可原成友謙汪宗友楊尔銘余日新一曰路阻宜  
留傅景星黃耳鼎徐養心向北劉憲章一曰未仕宜錄周  
亮工劉令尹朱朗鐸皆禦賊全城行取提授遇變潛身一  
曰棄官宜宥江詒詔鄭其勲金毓峒不汙偽命而逃  
壬申營建西宮以奉太后

東陽復亂尋討平之

癸酉馬士英以其姻越其杰總督河南

以樊一衡總督川陝

四川總兵趙光遠降賊

兵科給事中陳子龍自練水師入衛以職方司主事何剛統之先事賊逼京畿子龍與長樂知縣夏允彝主事何剛欲聯絡海舟直達津門因倡義募練水師得二千人而子龍由是為士英所忌

甲戌改兵部主事凌烟巡按山東御史

四鎮叅大學士姜曰廣左都御史劉宗周

曰廣奏迎立聖躬花押在簿祭廟撰文監國草詔墨迹未乾鎮臣身不與事豈得而悉之手臣在先朝丙子回籍壬午補官南都舊歲臘月始來抵任今追誤國一切握兵者不問柄政者不問獨懸坐山中一書生臣不服也挺擊一



案臣昨察國史係乙卯五月其時臣尚為諸生臣之丁仕版在  皇祖己未年也會議紅丸屬  嘉廟壬戌五月事臣時先以辛酉五月庶常給假歸籍矣履歷年月可覆而按也兩案之事與臣無與今俱無據牽台臣不受也

己卯舊輔王應熊倡義蜀中以閤街改兵部尚書總督川湖雲貴賜上方劍

馬士英使其私人朱統鐔叅禮部郎中周鍾武德兵備道雷縉祚逮之

士英奏科臣先時亨力阻  先帝南遷之議而身先從賊鑿鼎孽降賊後海見人則曰我固欲死小妾不肯小妾者為科臣時所娶秦淮娼婦願媚也他如陳名夏項煜等不

可枚舉臺省辭糾彈司寇不行法臣竊疑焉又大逆之尤者如庶吉士周鍾勸進未已上書于賊勸其早定江南又差家人寄書二封其子一封則言盡節死難一封則稱賊為新主盛夸其英武仁明及恩遇之隆以搖惑東南昨臣病中東鎮劉澤清誦其勸進表一聯比堯舜而多武功方湯武而無慙德又聞其過先帝梓宮之前洋洋得意竟不下馬微臣聞之不勝髮指其伯父周應秋周維持皆為魏忠賢門下走狗今犯復為闖賊忠臣梟獍聚于一門逆惡鍾于兩世按律謀危社稷者謂之謀反大逆不道宜加赤族之誅以為臣子之戒今其胞弟周銓尚廁衣冠之列其堂弟周鍾儼然寅清之署均當從坐以清逆黨臣按士

英此疏為殺周鑣張本也故與朱統鑣之疏前後上士英  
既翻逆案欲立從賊一案與之為對其言曰今之稽首從  
身汙偽命者皆昔之號正人君子者也而以周鑣為首者  
以復社諸人嘗跽于人曰吾輩繼東林而起不知復社不  
過場屋餘習與東林何異哉禮科索愷奏樞輔之言誠無  
深意然恐儉人乘間陽為正人口實陰為逆案解嘲甚且  
惜今日討賊之微詞為異日翻逆之轉語不至于壞國事  
而傾善類不已夫樞輔所稱號為正人君子者非所指光  
時亨龔鼎孳陳名夏周鍾項煜其人乎時亨鼎孳班行未  
久建白自喜其究竟為正人君子與否未有定論也名夏  
與鍾雕蟲小技故未嘗有正人君子之目若項煜者逆璫

餘孽自知公論不容改頭換面求附清流君子鄙之若居  
恒既負正人君子之稱臨難又着捐軀慷慨之節臣所聞  
倪文璐李邦華范景文施邦耀凌義渠馬世奇吳麟徵吳  
甘来成德金鉉諸人天下方以是信正人之不虛嘉君子  
之足藉顧獨舉一二偷息之游魂疑兩間充塞之正氣臣  
竊不甘為君子受也臣義就以鍾事論之其罪亦不過隨  
從賊例耳舉朝從賊而獨歸重一新進士之庶吉士又何  
其視鍾太高也至于士英疏中之言則為鄉人徐其霖所  
造初鍾與其兄鑣以門弟子相高汲引既廣敗類入馬兩  
家遂分門戶彼訕彼此謗兩家弟子相遇于路不交一揖  
鑣之門人以徐時霖為魁北都變後時霖利鍾之敗造為

惡言用相傳播而鑣者阮大鍼質首之仇也大鍼欲殺鑣而不得遂以鍾事中鑣是故時霖為鑣所而鍾啗鍾反因鍾以害鑣大鍼無心于殺鍾反因鑣以累鍾事之不可知如斯也鍾之就逮臣遇之句容道中語臣欲辨其誣臣曰子之誣辨之于君子易明也今欲殺子者豈君子乎鍾曰士英不欲殺某也某之兄弟與士英有故士英之母知士英之欲殺某也不食者數日必不使其殺某也臣曰其可哉豈知士英之愛母竟不如其愛大鍼也雷續祚母憂家居定策之際倡言福王不孝不宜主喪士英欲以此刃加之可洽者不得不試之續祚耳

贈吳三桂之父襄薊國公謚忠壯

庚辰皇太后諭選中宮

辛巳起罪官王永吉總督山東

永吉以薊遼總督以坐視神京之陷腆顏于世猶可謂之才乎當其巡撫山東一特頗有虛名癸未臣在劉宗周之座徐石麟有書感盛稱永吉宗周謂臣曰虞求失人矣由今視之不能不服宗周之先見也

癸未以皇太后至加史可法少傅兼太子太傅馬士英少保兼太子太師高弘圖姜曰廣王鐸俱太子太保  
謚死事巡按湖廣御史劉熙祚忠毅

熙祚武進人宗禎辛未進士獻賊破永州被執十六年九月二十七日殉難節于永陽賦詩二章于署中倥偬軍旅

已逾年家室迢遙久別顏南北骷髏已作壘湖湘宮殿倏  
成煙鶻血不成無塚骨鳥啼偏集有狐田死生遲速皆前  
定堅此丹心喚楚天故園隔別已經年今顏非復舊特顏  
山川草木俱含淚貔虎旌旗盡作煙老婦漫勞尋蜨夢兒  
孫切莫種書田養弘化碧非豪事畱此孤忠向九天

卹北變死節諸臣正祀文臣二十四人范景文贈太傅謚文  
貞倪文璐贈太保謚文正李邦華贈太保謚忠文王家彥贈  
太子少保謚忠端孟兆祥贈刑部尚書謚忠貞施邦耀贈左  
都御史謚忠介凌義渠贈刑部尚書謚忠靖周鳳翔贈禮部  
左侍郎謚文節馬世奇贈禮部右侍郎謚文忠劉理順正詹  
事謚文正汪偉贈少詹謚文烈申嘉胤贈太僕寺少卿謚節

愍吳麟徵贈侍郎謚忠節吳甘來贈太常寺卿謚忠烈節王  
章贈大理寺卿謚忠烈陳良謨贈太僕寺卿謚恭愍陳純德  
德贈太僕寺少卿謚恭節許直贈太僕寺卿謚忠節成德贈  
大理寺卿謚忠毅金鉉贈太僕寺少卿謚忠節衛景瑗贈兵  
部尚書謚忠毅朱之馮贈右都御史謚忠壯生員許琰贈五  
經博士布衣湯文瓊贈中書舍人正祀武臣七人劉文炳贈  
太師恒國公謚忠壯張度<sub>度</sub>錄贈太師惠安侯謚忠武李國楨  
贈太子太師襄城侯謚忠武劉文耀贈太保謚忠果輩永固  
贈少師謚貞愍周遇吉贈太保謚忠武吳襄<sub>襄</sub>忠壯正祀內臣  
一人王承恩謚忠愍正祀女子九人成德母張氏贈淑人金  
鉉母章氏贈恭人汪偉妻耿氏贈恭人馬世奇妻朱氏李氏



贈孺人劉理順妻萬氏妻李氏贈淑人陳良謨妻時氏贈孺人吳襄妻祖氏贈夫附祀文臣七人孟章明贈河南道御史徐有聲顧鎔彭瑄俞志虞俱贈太僕寺少卿徐標贈兵部尚書朱廷煥贈右都御史俱謚節愍附祀武臣十五人顧肇迹楊崇猷薛濂徐錫登郭培民宋裕德鄧文明朱時春朱純臣孫維藩吳道周王先通張光燦方履泰李國祿各晉爵一級內貲六人李鳳用王之心高時明褚憲章方正化張國元范景文弼質公北直吳橋人萬曆癸丑進士天啓五年任吏部考功司郎中時魏廣微以宦者宗人入相書臺省黃忠端李應昇周宗建八人姓名授太宰使謫之曰此八司馬故事也景文曰爭曰八人何罪廣微曰党人景文曰此

殺人媚人之事非景文所能也于是引疾歸崇禎十四年  
屢遷至南京兵部尚書又二年進東閣大學士賊至景文  
憂憤不食城陷自縊家人救之復賦詩二首冠帶投井  
倪元璐字玉汝上虞人天啓壬戌進士選入庶常散館時  
上虞有兩庶吉士其一陳維新例補一人于外而元璐有  
文名維新乃以其再娶詰之黃忠端持不可乃已魏忠賢  
敗其餘黨楊維垣等猶持三案之說以詰君子元璐奏要  
典為魏氏之私書請燬之 毅宗曰可于是小人側目誠  
意伯劉孔昭復訐其再娶之事遂歸已而起戶禮兩部尚  
書兼翰林院學士彰義門失守有詔召入密特語移特而  
出城陷元璐緋衣南北拜至關壯繆像前酌酒酹之訖而

自酹出坐堂上書其几曰宗社至此死當委我溝壑以志其痛自經于座當議其謚之時劉宗周欲以文忠謚之而元璐之弟元瓚必得文正為榮孔炤復信信不已嗟乎孔炤固小人之論然不如文忠之于元璐宜也

李邦華號懋明吉水人也為物望所歸天啓間江右士人借闖人以報復時邦華在外臣父黃忠端歎曰使李懋明而在江右之禍不至此崇禎末起為左都御史破城大書于門板曰堂堂大夫聖賢為徒忠孝大節矢死靡他自磬死

王家彥號同五莆田人也協理戎政兵部右侍郎闖賊圍城家彥以京營兵守安定門賊入家彥欲戰而士卒無應

者乃望闕叩頭哭曰臣無以報 皇上矣從城上擲身而  
下手足俱折家人扶入民舍家彥解帶自縊帶斷不死復  
縊乃絕或曰守德勝門賊入持刀脅之不肯降見殺  
孟兆祥號肖形山西澤州人士成進士以忤閹削籍起刑  
部右侍郎自縊于公署或曰守正陽門賊至死城下子章  
明守顯之癸未進士從死

施邦耀號四明餘姚人也己未進士左副都御史邦耀守  
城賊入道梗不得遂寓入民舍自縊居民恐累之解其懸  
入他舍又縊他舍民又解之邦耀取砒投燒酒飲之乃死  
絕命詩曰慚無半策匡時難惟有一死報君恩常邦耀求  
死不得時歎曰忠臣固不易做

凌義渠字駿甫烏程人乙丑進士大理寺卿三月十九日  
時爽闔閭對趨長安門拱立達旦門不啓乃還有傳毅  
宗出奔者義渠從往從之已聞升遐歸寓上書其父謂家  
人曰吾死題棺稱死節孤臣凌義渠之柩緋衣而縊

周鳳翔號東軒山陰人戊辰進士左春坊左庶子自磬死  
父母俱在遺詩有碧血九天依聖主白頭雙老戀忠魂之  
句

馬世奇字君常無錫人左春坊左諭德毅宗崩次日世  
奇沐浴更衣設香案于庭雜陳周易金剛經官印牙牌其  
上稽首謝恩復遙拜其母家人環泣曰太安人在未可死  
世奇曰正恐留此身為太安人玷耳以紗悅自經二妾朱

氏李氏從死大書于壁云馬世奇同二妾殉節于此  
劉理順號湛六開封杞縣人甲戌進士第一左春坊左中  
允城陷趣命治棺妻萬氏妾李氏顛及公之未瞑而死皆  
縊理順視其既絕拜之自為贊曰成仁取義孔孟所傳文  
信踐之吾何不然既擬魏科豈可苟全三忠祠內不愧前  
賢已而自縊幙頭平脚礙環不得入乃脫平脚口銜之引  
頸入環然後取平脚施于幙頭而卒

汪偉字長源休甯人翰林院簡討賊犯三輔偉流淚謂客  
曰國事公美客令乞歸以免偉曰偉既言之曷敢逃死三  
月十八日呼門者以六歲兒授之曰城破我當死以是兒  
累汝門者泣諾而公明日偉與妻耿氏同縊書其壁曰身

不可辱志不可降夫妻同死節義成雙偉懸于右耿氏懸于左耿氏曰左右失序不可改懸而沒

申嘉胤字井眉廣平永年人太僕寺丞賊勢漸逼朝臣多藉事引去胤行部畿縣或勸之不返嘉胤曰天下事壞于貪生畏死死于疾死于利死于刑戮死于房幃爭鬪均死也數死者寧死不惜遇君父大節縮首垂淚求免此真不善用死矣三月十二日入都十八日戒賓為其子煜行冠禮聞 毅宗崩出至王公殿過并投之僮號其上嘉胤井中應曰歸慰太安人君亡與亡有子作忠臣勿過慟也吳麟徵號磊壘海鹽人天啓壬戌進士榜下夢入神祠中一人偃而書碑視之乃文文山山河破碎身世浮沈之句

問其人曰隱士劉宗周覺而報榜者至當是時麟徵故不識劉宗周有言此山陰講學劉先生也宗周在儀曹麟徵遂北面為弟子崇禎十六年轉吏科都給事中明年三月初七日升太常少卿十五日守西直門十七日夜本兵張縉彥遣二卒欲出麟徵詰之語塞而公明日麟徵欲見上言事漏下二鼓吏部侍郎沈維炳幾禁行者麟徵不顧過大學士魏藻德于朝藻德曰公何惶遽如是耶國家如天之福豈有他虞宦者數十人佩刀離立殿陛間麟徵度不得見乃出十九日得勝門破麟徵自絰從者解之麟徵曰得一見天子而死未為晚也出門賊兵載道不得前乃入道左三元祠仰視屋梁曰吾終此矣從者皆哭夜半又自



經從者又解之麟徵曰誤我誤我已而其友祝淵祝至淵  
涕泣不能仰視麟徵歎曰子亦憶我榜下之夢乎是命也  
夫命也夫而又奚悲明日縊乃死南都初立劉宗周為左  
都御史臣之友陸符曰吳忠節之夢業身驗之矣御史大  
夫免乎哉臣曰請御史大夫誌忠節之墓以禳之可乎于  
是宗周遂為麟徵墓表乃宗周終殉國難是命也夫是命  
也夫

吳甘來字和受江西新昌人戶科都給事中與汪偉約死  
絕命詩有到底誰遺四海憂之句

王章字漢臣武進人也陝西道御史與光時亨守城賊入  
章猶親發二矢傷賊已而九門砲聲俱寂章謂亨曰事急

矣其歸死于帝所時亨欲易青衣章曰不可苟易冠裳倉卒得死官不官卒不卒矣章與時亨聯騎而行賊掩至呵道時亨下馬章曰視兵御史孰敢叱之賊攢刃而去日暮家人得尸于女牆下怒目張口一手據地疑以為生也章嘗讀書于司陳司徒廟中夢與司徒分庭而揖司徒曰忠孝吾與公等司徒故嘗以武功謚烈者

陳良謨號賓日鄞人四川道御史崇禎十一年臣父黃忠端易名之典久稽良謨獨上章言之城陷賊詩曰中天懸日月四海所畢照倏而陰霾昏日月失常道仰觀我明明薄蝕一時變書至此忽颶風集襲牖乃續云雷風自南來光復天心見大夫百執事其誰忘明君媿余沈疴久床第

淹數旬背城孰盡瘁巷戰杳無聲如何社稷靈惜爾順民  
形載舟亦覆舟古今同一轍順民即逆民奉觀非一日蒼  
蒼不可問國亡我何誓守無二心一死報君恩大明監察  
御史陳良謨書于賊陷北京之日妾時氏請同死時脆弱  
結繩不能急良謨助之時氏氣絕良謨腕力亦盡不能自  
結乃命家人結之曰所以成吾美也

陳純德號潛玄零陵人福建道御史督學順天行部至遵  
化道梗乃返京師自磬

許直字若魯如皋人考功司貢外傳聞天子從齊化出門  
出奔直往從之賊兵塞路乃歸而覓死家人以父在阻之  
直曰曩父寓書于直云無忝厥職便是孝子天下有君死

臣生謂之無忝者乎然則今日之死父命之矣于是叩頭  
君父作絕命詩使奴入室取繩環之奴手戰不能直揮之  
自縊

成德字玄升山西霍州人辛未進士知滋陽縣事尚氣好  
陵權貴文震孟入相道中不受郡縣私謁過其縣見成德  
德亦無所推讓搯臂而談臧否人物取其姓名甲乙之震  
孟遂書甲乙以入時溫體仁當國凡由體仁而進者皆德  
之所乙體仁知之以事中德下獄德母張氏日詣長安門  
朝官出入皆涕泣而訴之會體仁出朝張氏攘臂牽體仁  
下車挽鬚而問之體仁惶急不得脫乃謝去天子亦知德  
無他罪赦之起為武庫郎中李賊圍城德謂馬世奇曰主

憂臣辱主辱臣死吾等不能匡救貽禍至此惟有一死耳  
豫訂斯盟毋忘息壤城破張氏自縊德妻及妹皆從死德  
乃持隻鷄盃酒如東華門臨哭帝喪觸階死喪之旁

金鉉字伯玉家于輦以諫黃道周獄被杖起兵部主事巡  
視皇城賊入母章氏自縊入紫禁城投御河死

衛景瑗韓城人巡撫大同城破執之不屈被磔

朱之馮號勉益徐州人巡撫宣州府城破不屈被磔

許琰號玉重長州人諸生也聞北變自縊于福濟觀道士

解之又投胥江會潞王泊舟使人出之終以嘔血卒

湯文瓊立居都下城陷自經書其衣帶云位非文丞相之  
位心存文丞相之心

新樂侯劉文炳右都督劉文耀任邱人 毅宗皇太后之姪也賊人文炳曰為國盡臣豈可學單門偷活闔室死于水火而藏其祖母瀛國夫人生皇太后者于其客申湛然湛然以嬖婢畜之賊從湛然求瀛國擄笞數百以碾石壓之至死不言瀛國所在

張慶臻 仁宗昭皇后之外戚也自縊

李國楨字朝瑞總督京營先破城之四日國楨走馬見上曰守陴者不用命執扑以拱之一人起一人復卧可奈何二十一日賊得國楨國楨因言三事一陵寢不可廢二葬大行以天子禮三善護皇太子諸王當是時帝后皆歛以柳棺始命梓宮易之四月初二日為帝發喪百官莫臨

國楨徒跣執拂逆于田妃園寔而縊

鞏永固字弘圖尚光宗公主以尉馬都尉加少保喜文學嘗疏上疏為遊國諸臣請謚崇禎十六年公主卒城陷  
樞猶在堂永固驅諸女入閉而焚之大書世受國恩身不  
辱八字然後自縊

周遇吉寧武總兵官副將熊通以二千人過賊河上渡賊  
而通降通即為賊說遇吉遇吉斬之二月十三日賊圍寧  
武遇吉出城後賊過當又伏兵巷內開門誘賊入而殺之  
賊憤甚悉力攻之城陷為賊所磔其妻劉氏登墉射賊無  
虛發賊圍火燒之無一人出者賊至北京每搖手謂人曰  
汝朝若再有一周總兵吾輩安能到此

王承恩太監也賊以蘆席覆帝喪於東華門外承恩見賊痛哭爭之特奉兵張縉彥在側承恩罵之曰汝誤國至死此不思速殯大行而僂身進勸乎縉彥曰何與我事承恩連批其頰以頭觸之遇害

王之心大興人司禮監太監毅宗縊煤山樹上之心即于繩尾從死毅宗為社稷而死其于晉宋蒙塵之恥可謂一洒矣當是時乃不召羣臣俱入而與內監自經盡美未盡善也

徐有聲字聞復江甯人戶部郎中

顧鉉兵科給事中

彭瑄工科給事中



俞志虞御史為土賊所殺

徐標真定巡撫知府方茂華聞賊警豫出其家屬標下茂華于獄其叛將却標至城外殺之出茂華而降賊

朱廷煥大名兵備副使賊傳檄入城廷煥碎之三月初四日城破被殺

吏科都給事中章正宸諫起張捷

捷丹陽人故逆党也魏國公徐弘基公䟽起之使佐銓政有旨解學龍荐葉廷秀以主事批升都察院堂上官羣臣竊無一言今批用張捷便有議論是何情故

乙酉封鄭芝龍為南安伯

起逆案阮大鍼為添注兵部右侍郎

大鉞陞見後爭者不止亦遂遲留至此而假安遠侯柳昌祚之疏起用職方司郎中尹氏興奏崔魏之潛移國祚何殊逆闖之流毒京華在此不誅在彼為用則凡不忠不孝者皆得連苞引孽移亂天子之庭是育虵虺于室中而乳豺狼于春圃臣切知其不可也申罪討逆司馬職也逆莫大于黨亂罪莫大于無君今抗顏堂上者當年助逆之人即行檄四方何以折服羣賊之心而銷拜跋扈將軍之氣古者破格求材雖曰使貧使詐不聞使逆案可翻崔魏亦卹崔魏可卹闖賊亦可封人亦何憚而不為亂臣賊子哉左都御史劉宗周奏大鉞進退關係江右興哀有旨是否確論年來國家破壞是誰所致而獨責一大鉞也

九月戊子黃蜚改防江上

補謚遼陽陣亡總兵杜松武壯

庚寅黃得功高傑相攻

傑請于督輔欲將家眷安寓揚州得功發牌爭執謂揚州  
督輔撫節非諸鎮宜居以數百騎疾趨揚州傑即發兵  
邀得功于路又出奇兵以襲儀真史可法萬元吉與關人  
盧九德百計解息然後已

鄭鴻逵改防采石

癸巳叙江北勞馬士英加少傅進建極殿大學士盧九德加  
一級各廕錦衣衛指揮僉事古襲一人黃得功劉良佐各加  
一級廕一子錦衣衛千戶古襲丁啟睿免充為事官加升一

級廕一子入監讀書史可法加少師越其杰加兵部右侍郎  
左都御史劉宗周罷

大學士姜曰廣罷

曰廣辭疏云臣聞王者奉三無私以治天下故爵人于朝  
與衆共之 祖宗曾推之典所以行之萬世無敵也昨者  
翻逆案之舉導內侍而廢會推此尤不可之大者也夫斜  
封墨勅口勅處分種種覆轍載在史冊可覆視也臣觀  
先帝之善政雖多而以堅持逆案為甚善 先帝之害政  
亦間出而以頻出宦者為亂階用閣臣內侍矣用部臣勛  
臣內侍矣選大將選言官內侍矣他無足數論其尤者所  
得閣臣則貪淫巧猾之周延儒逢君浚民奸險刻毒之溫

體仁楊嗣昌偷生從賊之魏藻德也其所部得部臣則陰  
邪貪狡之王永吉陳新甲也其所得勛臣則力阻南遷盡  
撤守禦褻狂之李國禎也其所得大將則紂袴支離之王  
樸倪寵輩也其所得言官則貪橫無賴之史堃陳啓新也  
凡此皆力排眾議簡自中冑者也于其後効亦可覩矣  
皇上亦知內侍之故乎總緣鄙天熱心仕進一見擯于公  
論遂乞哀于內廷既在內庭豈詳外事但見其可憐之狀  
聽其一面之詞不能無動者而外廷口持清議之人亦有  
貪婪敗倫之事授之口實得以反唇而內廷遂以為攻之  
者盡皆如是也間以其事密聞于上又候上之意旨從而  
授之于是瓶一秘方但求面試至于平臺一對演習舊文

之中寢膏唇潤活之投機立談取官同登場之戲劇下殿得意類羸勝之販夫小人何知求勝而已陰奪會推之柄陽避中旨之名臣昔痛心此弊亦于講義敷陳但以未及揚言至今猶存隱恨 先帝既誤皇上豈堪再誤哉孟子曰人不足與適也政不足間也易曰正其本萬事理天威在上密勿深嚴臣安得事事而爭之但願深宮有暇時取大學衍義資治通鑑視之周宣漢武何以復還前烈晉元宋高何以終徂偏安武侯之出師征蠻何以惓惓親君子遠小人之說李綱受命禦虜何切切以信君子勿比小人為言反覆思維必能發聖心之天明破邪說于先覺夫然後國恥可得而息中興可得而期也 皇上與其用臣之

身不若行臣之言不行其言而但用其身是猶獸畜之以  
供人之刀俎也臣待罪綸扉仰體睿聖眷意主和衷事從  
退讓然而朝廷未肅風俗未改兵民之疑惑未解江河之  
備禦仍踈人望未孚貧風漸長無以北方近事驅虎進狼  
半壁東南仍同幕燕愧死無地終夜撫膺而嘆責臣者固  
已至矣時昨日江南一門人面告微臣蒙恩簡用田夫傳  
聞舉手相慶今既一月未見新恩大失所望臣畧引道前  
疏門人變色不語又原任吏垣熊開第亦出臣門以近日  
用又少失帖失威譏督輔忠勤王家臣所心折亦以未停  
逆案遂為臣鄉臺臣郭維絰所糾 皇上即此數事觀之  
臣若依為苟且容頭過身則操戈向臣者何必不在臣門

鄉哉有黨無鄙自無逃于明照而臣之處此則良苦矣苟  
好盡言終蹈不測之禍聊取充位又來鮮鮮恥之譏臣今  
誠病鬱鬱居此號號其來但求病而死又豈可得哉  
辛丑按湖廣御史黃澍職

辛丑補謚遜國文臣七十五人翰林侍講方孝孺文正翰林  
脩撰王叔英文忠脩撰王艮文節戶侍郎卓敬忠貞禮尚書  
陳迪忠烈兵尚書鐵鉉忠襄刑尚書暴昭剛烈禮侍郎黃觀  
文貞戶侍郎盧迴貞達郭任清毅刑侍郎胡子昭介愍都  
御史茅大芳忠愍御史大夫練子寧忠貞景清忠烈都御史  
陳性善忠節僉都御史周璿肅愍右拾遺戴德彛毅直理少  
卿胡閔忠烈寺丞鄒瑾貞愍太常寺卿黃子澄節愍少卿盧



原質節愍廖昇文節刑尚書侯泰勤貞侍郎金有聲翌愍張  
昂節愍主事徐子權貞確兵尚齊泰節愍侍郎邊昇果愍郎  
中譚翌貞愍主事樊士信莊愍刑科給事中黃鉞忠獻葉福  
節愍戶科都給事中陳繼之莊景韓永莊介御史曾鳳韶忠  
毅魏冕毅直高翔忠愍甘霖貞定王彬忠莊王度襄愍謝昇  
貞勤丁志方貞定春坊大學士林右貞穆編脩陳忠文愍戶  
主事巨毅直宗經魁宋徵直愍太子贊善連楹剛烈御史林  
英毅節浙江按察使王食貞毅江西副使程本立忠介陝西  
僉事林嘉猷穆愍徽州知府陳彥回惠節蘇州知府姚善忠  
惠松江同知周繼瑜莊節知沛縣劉顏伯瑋忠惠子有為孝  
節知樂平縣張彥方莊愍知蕭縣鄭恕惠節知獻縣向樸惠

莊沛縣主簿唐子清節義典史黃謙果義東平州吏目鄭華  
貞莊漳州教授陳思賢貞愍愍濟陽教諭王省貞烈子夔州  
通判王禎孝節谷府長史劉璟剛節衡府長史紀善周是脩  
貞毅燕府長史葛誠果愍寧府長史石撰貞愍晉府長史龍  
鐔忠愍遼府長史程通端直燕府伴讀俞逢辰忠愍參軍斷  
事高魏忠毅杜奇貞直武臣十七人魏國公徐輝祖貞越萬  
侯俞通淵策烈都指揮楊松壯愍謝貴勇愍彭二武壯馬宣  
貞壯朱鑑壯烈瞿能襄烈宋忠壯愍孫泰勇愍莊得勇愍張  
阜斫英烈俞琪翼愍指揮宋瑄果節張倫貞勇崇剛壯愍燕  
山衛卒儲福貞義女子六人方孝孺妻李氏貞愍王良妻  
氏貞烈儲福妻范氏孝節文臣脩撰吳成學尚書張統徐貞

侍郎毛泰黃魁徐堂侍讀樓璉僉都御史司中郎中柳一景  
張安國主事劉原弼巡撫黃清卿史程公智王玘韓郁大理  
丞彭興明劉端王高中書何中高遜志博士黃彥清監副劉  
伯完參政鄭居貞陳周按使李文敏黃直僉事胡子義知府  
黃希範孫鎮王璉楊任葉惠仲同知石允頤嘗典史周縉知  
州蔡運教諭劉周豐寅初訓導林大同鄭士達斷事錢芹長  
史鄒璞舉人劉政諸生高賢寧王志伍性原陳應周林鈺珏  
鄒君默曾走端呂賢布衣俞貞木王祿王賓楊福素祀山劉  
國譚仕謹等武臣長興侯耿炳文厯城侯盛庸深城侯李堅  
駙馬都尉梅殷耿璿胡現李祺都督同知陳質都督廖鏞廖  
銘平安孫岳耿獻甯忠陳暉潘忠徐凱都指揮彭聚卜萬楚

智伯揮盧振滕聚趙諒鎮撫楊平徐讓衛健小馬王曾濬周  
拱元千戶倪諒成卒龔翊瓦剌耀等內臣胡伯顙官職無考  
盧振梁良用郭良馬坤朱進王輝陳子方何西廉補錫匠馮  
翁王公東湖樂清耶溪三樵夫雲門僧洞庭居士雪菴和尚  
等從亡諸臣翰林史彬程濟趙天泰鄭洽侍郎廖平金焦郎  
中梁玉田司務馮淮御史葉希賢中書梁良玉梁中節宋和  
郭節監正王之臣尚書嚴震直教授楊應能鎮撫牛景先王  
資劉仲太監段實何洲周恕長壽吳亮等婦女王淑英妻并  
二女戴德彝嫂項氏齊泰女鐵鉉二女張安國妻黃觀二女  
龔泰妻鄭恕二女王省女譚翌妻鄒氏林英妻宋氏等皆附  
祀表忠祠

臣按革除之事簡編雜說錯誤甚多獻徵錄載王艮北師  
薄都城羣臣多往迎附艮獨閉門痛哭與妻子訣曰食人  
之祿者死人之事吾不復生矣安能顧我若等遂自鴆死  
然艮沒在建文三年解縉之墓表可証也此文節之謚亦  
甚無謂林右字公輔以字行王府教授三台文獻錄可証  
也此云春坊大學士所當改王正至于致身錄從亡隨筆  
皆偽書不足信禮臣尚多崇之致身錄托名翰林史彬作  
吳寬表史鑑之墓書其曾祖彬未嘗入仕則偽不待辨矣  
奪靖難大學士胡廣謚

謚靖難左都御史陳瑛醜厲

癸卯以王濬巡撫登萊

以總兵年文綬鎮守荊州

以王允成為岳州總兵官

謚沈子木恭靖沈儼炳襄敏

子木 于楚宗之事犯清議以逢迎一貫儼炳亦不足道  
其謚以孫胤培長禮垣也

甲辰起黃道周為禮部尚書兼侍讀學士協理詹事府事

宗室華堞聯絡楚寨

補謚直諫名臣御史蔣欽忠烈給事中周璽忠愍兵部主事  
陸震忠定工部主事何遵忠節刑部主事劉較孝毅行人孟  
陽忠定李紹賢忠端俞廷瓚忠愍詹寅忠憲李瀚臣忠毅詹  
軾忠潔劉平甫忠貞評事林公甫忠恪錦衣衛經歷沈練貞

肅指揮張瑛忠壯左僉都御史左光斗忠毅應天巡撫右僉  
都御史周起元忠惠左諭德繆昌期文貞御史黃尊素忠端  
李應昇忠毅周宗建忠毅袁化中忠愍給事中周朝端忠毅  
工部郎中萬璟忠貞副使顧大章裕愍

補謚開國文臣翰林學士陶安文憲御史中丞章溢莊敬左  
春坊大學士解縉文毅太子正字桂彥良敬裕訓導葉居昇  
忠愍翰林承旨唐同文憲處州總制孫炎忠愍胡深襄節左  
司郎中王愷莊愍太平知府許瑗惠節祭酒劉崧恭介兵部  
尚書唐鐸敬安韓國公李善長襄愍武臣郅國公馮國用武  
翼濟國公丁德興武襄德慶侯廖永忠武勇定遠侯王弼武  
威長興侯耿炳文武愍東莞伯何真恭靖永義侯桑世傑忠

烈河間郡公俞廷玉武烈東勝汪漢興祖武愍東海郡公茅  
成武烈樞密同知丁晉即武節都指揮韓成忠壯太平院判  
花雲忠毅

乙巳以定策功加朱國弼保國公

逮浙江安撫御史左光先光先不受逮

有旨姚孫斐前以貪橫激許成許都之變尚敢搜變賊產  
日事誅求又激成大變罪不容誅左光先力庇貪令威脅  
同官致于流毒東越着革了職法司提問追贓臣按先  
帝初立左魏兩家頗冤皆操戈于阮大鍼已又左氏刻行  
辨案分條細註大鍼之出光先論之最切故大鍼之所欲  
殺者周鏹之次即光先也光先逃入婺源山中金聲匿之



而士英大鉞以史可法故左氏之門人左良玉又其同宗  
疑在兩家故不敢急之

士子以定策功升太常寺少卿李沾為左都御史

以定策異議遷吏部左侍郎呂大器

以總兵盧鼎鎮守武昌

癸丑逮湖廣巡按御史黃澍澍不受逮

甲寅授罪樞張縉彥總督北直山西河南北

使閩人孫元德催浙福直三省錢糧

使閩人田成選淑女于杭州

或言內監出選皇太后命之其言甚褻所以來人之疑也



弘光寶錄鈔卷二終